



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL. Anr.104/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Hajriz Hoti kryesues, Bujar Muzaqi dhe Violeta Husaj Rugova anëtarë, duke vendosur lidhur me ankesën e subjektit politik Za Slobodu, Pravdu i Opstanak, me seli në Graçanicë, të parashtruar kundër subjektit politik Lista Serbe, me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore për Zgjedhjet Lokale në Republikën e Kosovës, në seancën e panelit të mbajtur më 08.10.2025, merr këtë,

V E N D I M

I. Pranohet si e bazuar ankesa e subjektit politik Za Slobodu, Pravdu i Opstanak, me seli në Graçanicë, ZL.Anr.104/2025 datë 06.10.2025.

II. Subjektit politik Lista Serbe, me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Zgjedhjet Lokale 2025 që do të mbahen më datë 12 Tetor 2025, i shqiptohet dënimi me gjobë në lartësi prej 1000 (njëmijë euro) Euro.

III. Detyrohet Subjekti politik Lista Serbe, me seli në Mitrovicë të Veriut, që gjobën e shqiptuar si në pikën -II- të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

IV. Urdhërohet Subjekti politik Lista Serbe, me seli në Mitrovicë të Veriut, që nga momenti i marrjes së këtij vendimi ta largojë posterin e vendosur në objekt banesor kolektiv në rrugën që çon drejt vendit kryesor të votimit në Leposaviq, përndryshe mosbindja ndaj kësaj urdhërese paraqet shkelje tjetër të këtij ligji që mund të sanksionohet me dënime shtesë nga PZAP-i.

A r s y e t i m

Me datë 06.10.2025, PZAP-i, ka pranuar ankesën e identifikuar me numër ZL.Anr.104/2025, ku theksohet se aktivistët e subjektit politik Za Slobodu, Pravdu i Opstanak, me datë 04.10.2025, gjatë

mbikëqyrjes së aktiviteteve të subjekteve të tjera politike, vunë re se përkrahësit e subjektit politik Lista Serbe, në territorin e komunës së Leposaviqit, vendosen një poster të madh në një vend të paautorizuar (ndërtesë) në rrugën që çon drejt vendit kryesor të votimit, i cili ndodhet në më pak se 100 metra, por gjithashtu është në kundërshtim me dispozitat ligjore të subjekteve politike, duke përdorur objekte për promovim dhe duke shkelur rregullat e fushatës zgjedhore, neni 7, paragrafi 2.9. Parashtruesi i ankesës thekson se vendosja e tillë e materialeve zgjedhore, pa pëlqimin paraprak të banorëve dhe pa kontraktim të rregullt, përbën shkelje të drejtpërdrejtë të dispozitave të Ligjit për Zgjedhjet e Përgjithshme dhe të Rregullores Zgjedhore Nr. 07/2024 për fushatën zgjedhore, dhe ky veprim jo vetëm që cenon barazinë ndërmjet subjekteve politike në procesin zgjedhor, por krijon gjithashtu një praktikë të papranueshme të uzurpimit të hapësirave të përbashkëta banesore, duke i ekspozuar qytetarët ndaj propagandës së pavullnetshme në mjediset ku ata jetojnë dhe ku duhet të ndihen të mbrojtur nga presioni politik. Sipas parashtruesit të ankesës kjo lloj praktike bie ndesh me parimin e barazisë së garës zgjedhore, me të drejtën për zgjedhje të lira e të ndershme dhe me standardet e demokracisë, duke i vendosur disa subjekte në një pozitë më të privilegjuar përballë të tjerëve përmes shfrytëzimit të hapësirave të palejuara. I njëjti kërkon nga PZAP-i që të konstatojë shkeljen e bërë nga Lista Serbe dhe të ndërmarrë masat e parapara ligjore, duke përfshirë urdhrin për largimin e menjëhershëm të materialeve të vendosura në mënyrë të kundërligjshme dhe shqiptimin e sanksioneve administrative të përcaktuara nga ligji dhe rregulloret zgjedhore. Si dëshmi ka bashkangjitur një fotografi.

Subjekti politik Lista Serbe nuk është përgjigjur dhe nuk ka ofruar ndonjë përgjigje lidhur me pretendimet e parashtruesit të ankesës.

Paneli Zgjedhor për Ankesa dhe Parashtrës-PZAP, pasi shqyrtimit të ankesës, dhe provave të bashkangjitura ankesës, vëren se ankesa është e bazuar.

Paneli pas shikimit të shkresave të lëndës, vlerësoj se pretendimet e Subjektit Politik Za Slobodu, Pravdu i Opstanak, janë të qëndrueshme dhe të bazuara, dhe si të tilla i aprovoj, për faktin se veprimet e përshkruara në ankesë paraqesin shkelje nga ana e subjektit politik Lista Serbe, ngase e njëjta ka vendosur një poster në objekt banesor kolektiv, përkatësisht në qendër të komunës së Leposaviqit ku është vendosur një poster i madh në një ndërtesë në rrugën që çon drejt vendit kryesor të votimit. Paneli vlerëson se Lista Serbe me këto veprime ka shkelur dispozitat e nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, në të cilin përcaktohet se *“Veprimet e ndaluara të Subjekteve Politike...Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve.”*

Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes, dhe ndikimit të mundshëm të saj në procesin zgjedhor, shkallën dhe peshën e shkeljes, po ashtu fakti se është përsëritës i shkeljeve të tilla dhe se ky veprim i tyre përbën shkelje të dispozitave të sipërcituara ligjore. Po ashtu, Subjekti Politik, Lista Serbe, ka qenë i njoftuar me obligimet dhe përgjegjësitë gjatë procesit të fushatës zgjedhore, prandaj vendosja e posterëve-njoftimeve të subjektit të tyre politik për fushatë zgjedhore në objekte publike gjegjësisht në objekte banesore kolektive në Leposaviq, pa pëlqim të organit kompetent komunal përbën shkelje të legjislacionit zgjedhor, dhe e njëjta shkelje është e sanksionuar me nenin 34 paragrafi 1 nën paragrafi 1.2 të Ligjit NR.08/L-228, për Zgjedhjet e Përgjithshme në Republikën e Kosovës.

Prandaj, duke u mbështetur në nenin 117.3 të Ligjit NR.08/L-228, për Zgjedhjet e Përgjithshme në Republikën e Kosovës në të cilin është përcaktuar se *“Vendosja për ankesat nga PZAP-ja mbështetet në dëshmi të qarta dhe bindëse”*, Paneli vlerësoj se pretendimet e tilla të palës ankuese janë të qëndrueshme dhe të mbështetura në dëshmi bindëse dhe si të tilla i pranoi, sepse kjo shkelje ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Paneli vlerëson se në rastin konkret Lista Serbe urdhërohet që nga momenti i marrjes së këtij vendimi të largojë posterin e vendosur në objekt banesor kolektiv, përkatësisht në Leposaviq, ndërsa dështimi për t’iu bindur kësaj urdhëresë të PZAP-it, brenda periudhës së përmendur në vendim, paraqet shkelje tjetër të këtij ligji që mund të sanksionohet me dënime shtesë nga PZAP.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1, dhe neni 120 paragrafi 1 nën paragrafi 1.3, dhe paragrafi 2, të Ligjit NR.08/L-228, për Zgjedhjet e Përgjithshme në Republikën e Kosovës, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.104/2025 datë 08.10.2025

Kryesues i Panelit
Hajriz Hoxha



Këshillë Juridike; Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykata Supreme të Kosovë, brenda 48 orëve nga momenti i marrjes-pranimi të këtij vendimi.